

Shalom, boyei malamumu, tótángana Biblia, Liloba ya Nzambe.
Ezali malamumu koyeba Nzambe mpo tózala na kimya. Biblia elobi
bongo na:

Yobo 22:21 (Mokanda na Bomoi)

*“Yebá Nzambe malamumu, mpe okomonana na kimya; bongo
bolamumu ekoyela yo.”*

Elingi koloba ete, soki toyebi malamumu mokano mpe bizaleli ya
Nzambe, tokokóma na kimya, mpe bolamumu ekolanda bomoi na
biso.

Lelo, na ngolu ya Nkolo, tótalela moke bizaleli ya Nzambe.
Na bomoi na biso ya mokolo na mokolo, mingi kati na biso
tokutanaka na komekama ebele oyo ewutaka epayi ya bato
mosusu. Ezali bato oyo basalelaka Monguna, Satana, mpo
báumisa biso na mayoki mpe ata na nzoto. Mpe likambo ya pasi
koleka, basalaka yango na boyebi nyonso. Na maloba ya mokolo
na mokolo, bato wana babengami banguna.

Soki lelo otuni moto moko: “Ozali na banguna?”, ezalaka mpasi

mingi koyoka moto aloba ete azali na banguna te. Mbala mingi, moto nyonso azali na banguna na ndenge moko to mosusu. Bamosusu banguna na bango ezali bato oyo banyokolaka bango; bamosusu ezali bato oyo bamonisaka bango kotyola; bamosusu ezali bato oyo bamimonisaka minene likoló na bango; bamosusu lisusu ezali bato oyo bazali na zuwa, mpe bongo na bongo. Na mikolo oyo tozali na yango, bato mingi bazali kolela Nzambe mpo na bitumba oyo bazali na yango liboso ya bato oyo babengaka banguna na bango.

Okokuta moto akei na lingomba kosenga Nzambe atombola ye na mosala mpo atyola esila epayi ya bato oyo batyolaka ye; mosusu akokuta azali na bilei te mpe azali kosamba mpo ete Nzambe akanga minoko ya bato mosusu (oyo na miso na ye bazali banguna na ye). Kasi ezali bato moke mpenza oyo bazali kosamba mpe kokanga bilei mpo Nzambe apesa bango mosala malamumu to libaku moko mpo básalela Ye na nzela ya yango.

Ezali bongo ete etumba wana na banguna ebandaki lelo te; ebandaki kala mpenza na Biblia. Lelo tokoyekola bandakisa mosusu ya bato oyo babundaki na banguna na bango, mpe na nzela ya bandakisa wana, biso mpe tokoyeba mayoki ya Nzambe mpo na bato oyo tobengaka banguna na biso, mpe ndenge nini

tosengeli kosala na bango.

HANA NA PENINA

Bango bazalaki basi mibale ya mobali moko oyo abengamaki Elkana. Penina azalaki na bana, kasi Hana azalaki na bana te. Biblia elobi ete Penina abandaki kotyola mpe kosambisa Hana makasi mpo azalaki libota te.

1 Samwele 1:6 (Mokanda na Bomoi)

“Mpenza, Penina, mobali mosusu ya Hana, azalaki kotyola ye mpe kosilikisa ye makasi mpo ete Yawe akangaki libota na ye.”

Na mokuse, Penina azalaki kosambwisa mpe kotyola Hana mpo kaka ye azalaki na bana, Hana te.

Soki ozali mwasi mpe ozali kotánga makambo oyo, meká komitya na esika wana: ozali na mwana te, mpe mwasi mosusu oyo azali na mwana azali kosala yo mabe na maloba ya koyokisa pasi mpe kotyola yo. Na ntembe te, moto wana akómí monguna na yo.

Yango nde esalemaki na Hana. Nsima ya kotyolama mingi na mwasi moninga na ye, ayokaki ete ayebi lisusu kokanga motema te, akómaki kolela Nzambe. Nsima, lokola toyebi lisolo yango, Nzambe ayokaki kolela na ye mpe apesaki ye bana.

Kasi tótala sik’oyo Elkana, mobali ya basi nyonso mibale. Ata soki Hana mpe Penina bazalaki banguna, Elkana azalaki kolinga bango nyonso mibale. Tango Hana abotaki mwana, yango esalaki te ete Elkana ayina bana ya Penina, to ayina Penina ye moko. Ata soki Hana mpe Penina bazalaki banguna, ye azalaki na likunzu te epayi ya moko.

Ezali mpe bongo epayi ya Nzambe na biso. Moto oyo azali monguna na yo, moto oyo oyinaka, elingi koloba te ete Nzambe mpe ayinaka ye ndenge yo ozali koyina ye. Moto oyo azali koyokisa yo pasi makasi, elingi koloba te ete Nzambe mpe azali koyoka ye pasi ndenge yo ozali koyoka. Yango wana, kobongola te kanda na yo ezala kanda ya Nzambe.

SARA NA HAJARI

Tótalela lisusu ndakisa mosusu: Sara na Hajari. Bango mpe bazalaki basi mibale oyo bakómaki kokabola mobali moko,

Abrahama. Hajari abotaki mwana, kasi Sara azalaki naino na mwana te. Hajari, oyo azalaki mosali ya Sara, abandaki kotyola nkolo mwasi na ye mpo azalaki na mwana te. Boye, bitumba mpe kowelana makasi ebimaki kati na bango.

Tango ekokaki ete Nzambe afungola libota ya Sara, Sara abenganaki Hajari elongo na mwana na ye Isimaele.

Kasi tótuna: likunzu oyo Sara azalaki na yango epayi ya Isimaele, ezalaki nde mpe likunzu oyo Abrahama azalaki na yango epayi ya mwana wana? Te!

To lisusu, likunzu oyo Hajari azalaki na yango epayi ya Isaka, mwana ya Sara, ezalaki nde likunzu oyo Abrahama azalaki na yango epayi ya Isaka? Te!

Abrahama azalaki kolinga bana na ye nyonso mibale, ata soki bamama na bango bazalaki koyokana te.

Ezali mpe bongo: moto oyo ozali komona lelo ete azali monguna na yo, moto oyo azali koyokisa yo pasi mpe kolelisa yo, kosepela te kokanisa ete Nzambe ayinaka ye ndenge yo ozali koyina ye. Oyo Nzambe akosala, akoki kaka kolongola ye mosika na yo, kasi kosepela te kokanisa ete Nzambe azali na likunzu epayi na ye ndenge yo ozali na yango. Mpe kosepela te kokanisa ete Nzambe

akoboma ye mpo na yo. Longola makanisi wana nyonso!

Bandá lelo: “Yebá Nzambe malamú mpo ozala na kimya.”

Kobungisa te ntango na kosamba ete banguna na yo bákufa, mpo bakokufa te! Ezali lokola Sara atindaki Abrahama akende koboma Isimaele—ezali kaka kobungisa ntango.

Ndenge moko mpe, kóbangana te soki monguna na yo azali kosamba ete Nzambe asala yo mabe. Azali kaka kobungisa ntango, mpo likunzu oyo azali na yango epayi na yo, ezali te likunzu oyo Nzambe azali na yango epayi na yo.

Maloba ya Nkolo Yesu

Matai 5:43-46 (Mokanda na Bomoi)

“Boyokaki ete balobaki: ‘Lingá moninga na yo, mpe yiná monguna na yo.’

Kasi ngai nalobi na bino: Lingá banguna na bino, mpe bosambela bato oyo banyokolaka bino, mpo bokóma bana ya Tata na bino oyo azali na likoló. Pamba te, Ye asalaka ete moi na Ye ebima mpo na bato mabe mpe bato malamú, mpe abimisaka mbula mpo na bato ya sembo mpe bato ya mabe.

Pamba te soki bolingi kaka bato oyo balingaka bino, lifuti nini bozali na yango? Ata bakongoli mpako basalaka bongo te?"

Soki bazali koyokisa yo pasi, kobungisa te ntango na kosamba ete mabe ekwela ndeko na yo. Yango ezali mokano ya Nzambe te. Mpe kosepela te soki akwei. Okanisi ete Elkana azalaki kosepela na bitumba kati na Hana mpe Penina? Te! Ndenge moko, Nzambe asepelaka te tango tozali na bitumba na bato oyo bayinaka biso, mpe asepelaka te na mabondeli ya bitumba.

Masese 24:17-18 (Mokanda na Bomoi)
"Kosepela te tango monguna na yo akwei,
mpe motema na yo esepela te tango akweyi.
Yawe akoki komona yango, mpe akosilika,
bongo akolongola kanda na Ye epayi na ye."

Yango wana, kobanga te! Tango moto azali koyina yo, kosala yo mabe, to kofunda yo liboso ya Nzambe, yebá ete azali kaka kobungisa ntango. Nzambe ayinaka yo te ndenge ye azali koyina yo.

LIKUNZI OYO OZALI NA YANGO EPAYI YA BANGUNA NA YO,
EZALI TE LIKUNZI OYO NZAMBE AZALI NA YANGO EPAYI NA
BANGO

Nkolo apambola biso nyonso.

Share on:
WhatsApp